



Item die sechs eck wil ich dreierley weis zusammen setzen. Erstlich steck ich sie in eynander/ das all seitten eck vnd winkel an einander anrüren / vnd nichts lers von selbt dar zwischen bleibet. Zum andern stell ich sie an eynander das sie alleyn mit iren ecken an eynadder anrüren/ so bleyben driangel zwischen den sechs ecken. Zum dritten stell ich sie an eynander/ also das eyn yeliche die andern mit zweyen seitten vnud zweyen ecken anrür/ so bleiben firecket rauten darzwischen/ wie ich das nachfolget hab aufgerissen.



Die sibeneck wil ich zweyerley weis zusammen setzen/ Erstlich/ das sie mit iren ecken an eynander anrüren / so bleyben driangel vnd virecket stern darzwischen / in dise steren/ mache man stierung die die eck rüren/ oder zeuche eyn Endres creuz von eynem eck zum andern. Zum andern/ setz ich seitten/ vnd zwey eck auff eynander auffrecht / vnd so ich solch zeilen / neben eynander setz/ so lasz ich die eck/ neben an der seitten an eynander anrüren/ so bleyben stierung/ vnd der forigen steren zwischen den sibenecken/ wie ich das hernach hab gerissen. Item so man die sibeneck mit den seitten nach eynander an eynander setz/ als das aussen zwey/ vnd innen eyn eck für schliessen / so gend sie in eim circel herumb/ schliessen/ aber nit / des gleichen thund auch die fünffeck.